

**FRAMKVÆMDARREGLUGERÐ FRAMKVÆMDASTJÓRNARINNAR (ESB)
nr. 427/2012**

2013/EES/16/06

frá 22. maí 2012

**um rýmkun á sérstökum ábyrgðum varðandi salmonellu sem mælt er fyrir um í reglugerð (EB)
nr. 853/2004 svo að þær nái til eggja sem á að flytja til Danmerkur (*)**

FRAMKVÆMDASTJÓRN EVRÓPUSAMBANDSINS
HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (EB) nr. 853/2004 frá 29. apríl 2004 um sérstakar reglur um hollustuhætti sem varða matvæli úr dýraríkinu ⁽¹⁾, einkum b-lið 3. mgr. 8. gr.,

og að teknu tilliti til eftirfarandi:

- 1) Í reglugerð (EB) nr. 853/2004 er mælt fyrir um sérstakar reglur um hollustuhætti sem varða matvæli úr dýraríkinu er gildi fyrir stjórnendur matvælafræðingja. Í 8. gr. þeirrar reglugerðar er kveðið á um sérstakar ábyrgðir fyrir matvæli úr dýraríkinu sem ætluð eru fyrir finnskan og sænskan markað. Til samræmis við það þurfa stjórnendur matvælafræðingja, sem ætla að setja egg á markað í þessum aðildarríkjum, að uppfylla tilteknar reglur að því er varðar salmonellu. Þar er einnig kveðið á um að sendingum af slíkum eggjum skuli fylgja vottorð þess efnis að örverufræðileg prófun hafi farið fram með neikvæðum niðurstöðum í samræmi við löggjöf Sambandsins.
- 2) Með reglugerð framkvæmdastjórnarinnar (EB) nr. 1688/2005 frá 14. október 2005 um framkvæmd reglugerðar Evrópuþingsins og ráðsins (EB) nr. 853/2004 að því er varðar sérstakar ábyrgðir varðandi salmonellu vegna sendinga af tilteknum tegundum kjöts og eggja til Finnlands og Svíþjóðar ⁽²⁾ eru veittar slíkar sérstakar ábyrgðir.
- 3) Ennfremur er í reglugerð (EB) nr. 1688/2005 mælt fyrir um reglur um sýnatöku úr upprunahópum eggja og örverufræðilegar aðferðir við að rannsaka viðkomandi sýni. Í henni er einnig sett fram fyrirmynd að heilbrigðisvottorði sem skal fylgja sendingum af eggjum.
- 4) Samkvæmt reglugerð (EB) nr. 853/2004 er heimilt að rýmka sérstöku ábyrgðirnar að því er varðar tiltekin matvæli úr dýraríkinu þannig að þær nái, í heild eða að hluta, til allra aðildarríkja eða svæða aðildarríkis þar sem í gildi er varnaráætlun sem hefur verið viðurkennd sem jafngild þeirri varnaráætlun, sem var samþykkt fyrir Finnland og Svíþjóð, að því er varðar viðkomandi matvæli úr dýraríkinu.
- 5) Hinn 5. október 2007 sendi Matvælastofnun Danmerkur umsókn til framkvæmdastjórnarinnar um leyfi fyrir

sérstökum ábyrgðum til handa Danmörku að því er varðar salmonellu í eggjum fyrir alla Danmörku í samræmi við reglugerð (EB) nr. 853/2004. Í umsókninni er lýsing á dönsku varnaráætluninni um salmonellu í eggjum.

- 6) Á fundi sínum 18. júní 2008 samþykkti fastanefndin um matvælaferlið og heilbrigði dýra vinnuskjal starfsfólks framkvæmdastjórnarinnar sem ber yfirskriftina „Leiðbeiningarskjal um lágmarkskröfur fyrir varnaráætlanir um salmonellu sem skulu viðurkenndar sem jafngildar þeim varnaráætlunum, sem voru samþykktar fyrir Svíþjóð og Finnland, að því er varðar kjöt og egg af tegundinni *Gallus gallus*“ (Guidance document on the minimum requirements for salmonella control programmes to be recognised equivalent to those approved for Sweden and Finland in respect of meat and eggs of *Gallus gallus*) (hér á eftir nefnt leiðbeiningarskjal).
- 7) Danska varnaráætlunin um salmonellu í eggjum telst jafngild þeirri varnaráætlun sem var samþykkt fyrir Finnland og Svíþjóð og er í samræmi við leiðbeiningarskjalið. Að auki lögðu yfirvöld í Danmörku fram upplýsingar 20. maí 2011 sem sýna fram á að algengi salmonellu í hópum kjúklinga og fullorðinna varphæna í Danmörku 2008, 2009 og 2010 var einnig í samræmi við leiðbeiningarskjalið.
- 8) Því skal rýmka sérstöku ábyrgðirnar svo að þær nái til eggja sem á að flytja til Danmerkur. Að auki skulu reglurnar, sem mælt er fyrir um í reglugerð (EB) nr. 1688/2005 um sýnatöku úr upprunahópum eggja, örverufræðilegar aðferðir til að rannsaka viðkomandi sýni og fyrirmyndina að heilbrigðisvottorði, gilda um slíkar sendingar.
- 9) Ráðstafanirnar, sem kveðið er á um í þessari reglugerð, eru í samræmi við álit fastanefndarinnar um matvælaferlið og heilbrigði dýra.

SAMÞYKKT REGLUGERÐ ÞESSA:

1. gr.

Danmörku er heimilt að nota sérstöku ábyrgðirnar um salmonellu, sem mælt er fyrir um í 2. mgr. 8. gr. reglugerðar (EB) nr. 853/2004, að því er varðar sendingar af eggjum, eins og skilgreint er í lið 5.1 í I. viðauka við reglugerð (EB) nr. 853/2004, sem á að flytja til Danmerkur.

2. gr.

1. Sýnataka úr upprunahópum eggjanna, sem um getur í 1. gr., skal fara fram í samræmi við 4. gr. reglugerðar (EB) nr. 1688/2005.
2. Sýnin, sem um getur í 1. mgr., skulu gangast undir örverufræðilegar prófanir vegna salmonellu í samræmi við 1. mgr. 5. gr. reglugerðar (EB) nr. 1688/2005.

(*) Þessi EB-gerð birtist í Stjtið. ESB L 132, 23.5.2012, bls. 8. Hennar var getið í ákvörðun sameiginlegu EES-nefndarinnar nr. 205/2012 frá 7. desember 2012 um breytingu á I. viðauka (Heilbrigði dýra og plantna) við EES-samninginn, sjá *EES-viðbætur við Stjórnartíðindi Evrópusambandsins*, biður birtingar.

⁽¹⁾ Stjtið. ESB L 139, 30.4.2004, bls. 55.

⁽²⁾ Stjtið. ESB L 271, 15.10.2005, bls. 17.

3. gr.

Sendingum af eggjum, sem um getur í 1. gr., skal fylgja vottorð sem er í samræmi við fyrirmyndina sem kveðið er á um í 2. mgr. 6. gr. reglugerðar (EB) nr. 1688/2005.

4. gr.

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

Hún kemur til framkvæmda frá og með 1. júlí 2012.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 22. maí 2012.

Fyrir hönd framkvæmdastjórnarinnar

forseti.

José Manuel BARROSO
